

四庫全書

集部

欽定四庫全書

集部

石倉歷代詩選卷二百

二十七至
三十

詳校官庶吉士臣范逢恩

侍讀臣孫球覆勘

總校官進士臣朱

鈴

校對官中書臣葉

蘭

謄錄監生臣宗

煒

欽定四庫全書

石倉歷代詩選卷二百一十七

明 曹學佺 編

宋詩一百四

釋淨端

贈吳少卿入山

友人相訪入柴關
雲水寬閒溪澗寒
莫道山家無可待
老松修竹任君看

和友人入山韻

閒來無事對山屏
古澗寒松暢野情
是處巖華高下色
幾般幽鳥往來聲

師於寺側建一小庵
乃號歸雲
每書偈詠於壁
間云

老來林下養閒軀
茆屋清虛蚊蚋無
一徑松風何處起
入松穿竹兩三株

睡起

石枕藤牀一榻低
覺來還自日沈西
白雲堆裏翻身轉
一曲漁歌在碧溪

自述

瀟灑巖居畔
結茆惟一菴
清風銷暑氣
寂寞少人貪
幽有鳥聲碎
禪無衲子叅
齋餘林下去
華雨落毵毵

山居詩

吳山古寺近溪邊
高閣虛堂景象全
林下寂寥鑪火盡
未眠猶聽夜行船

蘭若雜言

吳山古寺寒松直老鶴巢居最上頭
惟愛月明中夜後一聲清唳滿山愁

老嫌俗客來相訪獨泛孤舟溪上遊
夜宿蘆華賞明月應無閒事挂心頭

老來無事掩柴扉林下閒閒何所為
莫道茆菴無一物窗前片片白雲飛

野老欣欣任自然齋餘無事翫林泉
門前竟日無人到

夜對喬松月在天

年老醒醒神更清
夜深幽室誦蓮經
兒孫睡覺應嫌我
石版時敲四五聲

老拙懶陪塵俗客
茆屋靜坐復安眠
林間莫道無看待
松竹溪山在目前

巖前松竹兩三株
日炙風吹漸已枯
葉落縱橫人不掃
清聲猶自響朝晡

因觀楊柳垂青眼
始覺人間春到來
遙望南山雪消盡

寒梅猶有一枝開

登慈雲嶺

千古慈雲嶺諸方南北行江波與湖水極目兩分明

長興周承事相訪

吳山長碧水長流水轉山灣路更幽多謝龐公遠相訪
旋燒松火薦茶甌

漸覺清和四月天一聲清磬響山川心澄氣爽無拘束
留得高人伴夜禪

張居士相訪

清河居士別多年一笑相逢信有緣
莫訝老僧無別話平常心是祖師禪

答陸蒙老韻

枕上浮生過半百短髮毵毵霜樣白
西溪河上舊家山歲歲故鄉歸似客
船頭漸進古松門云是吳筠讀書宅
烟雲半嶺望層樓鰲頂崢嶸藥宮窄
有人挂衲歸盤陀稜稜瘦骨真維摩
幾年面壁舌不動忽然拍手賡魚歌



秋來滿船載明月
俄驚雨笠仍烟蓑
黃梅渡口水流急
五湖深處任風波

同蘇饒文宿吉祥寺

與公昔作長城別
一去塵埃六七年
夜靜書堂尋舊約
定將生計話林泉

送客之三衢

今日忽相見
俄然又相別
三衢山水清
好賞中秋月

題假山石

無用無知頑石頭天生奇巧世人求算來世上無閒物
假使無情不自由

曾曇老

漁家生計好終日泛輕舟剪竹為竿釣裁荷作酒甌只
知溪上樂不識世間愁昨夜巖隈下蓑衣忘却收

祥符寺溪堂

開窻滿目見溪山雪水東流下嶺灣夜月深明漁舫寂
白雲無事到禪關

述懷

晦跡歸巖塢僻居人到稀披衣眠靜榻策杖遶荆扉遠
謝名兼利能忘是與非松風祛暑薄山月照螢微烹茗
滿甌雪掬泉半濕衣窮通雲意密終與世人違

附慈受禪師擬寒山詩

我愛寒山子身貧心自如吟詩無韻度燒火賸工夫敝
垢衣慵洗崩髻髮懶梳相逢但長嘯肉眼豈知渠

又

拾得詩清苦風騷道自存看雲歌竹石步月出松門識
取心中印休磨鏡上痕時時多漏泄塵世少知恩

又

人生萍托水流轉成愛河鼓激無明風出生死波一
念若知歇諸緣皆息魔急須登覺岸勸子莫蹉跎

又

人生貪愛重所欲未嘗周一飯飽足矣萬鍾心未休黑
業何時了紅裙也自羞鬚毛已侵雪猶自日悠悠

又

何曾食萬錢顏子飲一瓢賢者心念道愚人志在庖賢
愚趣不同何翅雲泥遙養養恐非福可信如昭昭

又

人生貴無業不貴多技能技能人看好業能灾汝形文
章妙天下氣宇吞滄溟此身若一失六趣且飄零

又

世間聰明人必欲聞其過寧知業所使大抵貪成禍因

果鏡中容容豈非是我陰報最分明詎論官職大

又

人生如春花能得幾時好朝吹與暮洗朱顏變枯槁花
落有後生人老不復少萬事只今休莫更招煩惱

又

世人怕說死說著死便諱及到死期來老眼先垂淚戀
妻復戀妾見神並見鬼不入祖師門癡迷直到底

又

六十休造屋七十莫置衣縱然得受用能得幾多時身心要早歇準擬與死期正如人遠出預辦為便宜

又

道力與福力平時似亂真福力有盛衰道力無富貧人生不學道只種輪迴因君看天福盡滿眼生埃塵

又

自料七十歲勿遽那能期況今五六十形骸覺漸衰正如春暮後青多紅少時去住呼吸間斯言真不欺

又

譬如臨明鏡面目各相對好者默自欣醜者亦知愧惟鏡兩無情光明常一體若人心似鏡成佛在彈指

又

厚葬非孝心死者必遭辱君看離亂時何墓不伐斷黃金衆賊分白日孤鬼哭最愛莊周叟天地為棺木

又

出家要省緣省緣易入道如何無事人婁攬閒煩惱奔

走富貴門莊嚴房舍好不知被物使區區直到老

又

若以爭止爭其諍轉不已惟忍能止諍是法中尊貴不
見老瞿曇妙相三十二魔軍刀劍來只以無心對

又

人身苟無業生死何足疑生也不須戀死亦不須悲一
身真逆旅萬事皆兒嬉請來綠巖畔與君歌紫芝

又

靜看營巢燕銜泥日千轉一桮貧家梁一宿王宮殿寄
託暫時間何暇分貴賤人生達此理沒齒無欣怨

又

貧窮難作福富貴易造罪有力無道心有心無貨賄有
福有道心百中無一二不見老瞿曇福慧雙嚴美

又

佛為大醫王留經治衆病衆生雖讀經展轉不相應病
是貪嗔癡掃除須淨盡貪嗔癡不除無緣了真性

石倉歷代詩選卷二百二十七

欽定四庫全書

石倉歷代詩選卷二百二十八

明 曹學佺 編

宋詩一百五

釋真淨

了義

迷頭曾認影了悟總成非
唯有道心在更無禪病依
靜中聞水過閒裏見蜂飛
一天真事何人共所歸

南臺石頭真堂

南臺石上樹樹子今古何人道可齊昔日住庵真斧在
夜來明月落前溪

滁州全椒塔院鑒上人邀宿草庵

未能真與佛同龕且向途中息草庵勿謂無心便休去
前三三有後三三

庵內不知塵世事此心能有幾人全黑龍山寺椒城外
路入青林隱翠烟

弔黃龍和尚塔

示滅師何速空遺塔此中僧閒四海錫誰復九年風鳥
外千峰遠人間一徑通寥寥朝與暮唯有白雲同

呈筠守徐朝議辭九峰命二首

捨家從學道無用樂天真豈謂至愚者仍慚衰病身不
堪為度世止合作閒人乞放歸山去翛然老百春

六十四年期歸閒已是遲一身終有限萬事畢無時學
道當求靜為僧此合宜蜀江賢太守外護却應知

大寧山堂

禪家能自靜住處是深山門外事雖擾座中人亦閒漁
歌聞別浦鴈陣下前灣即此非他物何妨洪府間

寄西庵法眼安師

不聞庵外事此意有誰知林壑路窮處世途心盡時鐘
聲來舊寺月色下新池却笑承風者區區老若為

寂軒

本來心自寂不必更論禪我欲辭多事誰來共少緣萬

山青靄裏五老碧峰邊第一幽藏處廬山小洞天

留題東軒

佛子異行藏開軒亦有方故因迎夜月仍得待朝陽羣
木烟初暖幽蘭谷正香坐來禪性澹蜂蝶自輕狂

答靖安黃尉問疾

書來蒙慰問外護力何偏槌鼓會雲侶焚香開雪牋滿
池蓮出水斜漢月生天祇似新裁錦文章少比肩

宿彬上人房

人事少相干亦由居處偏不隨流過日常得自安禪野
色郊原接雞聲市井連此身仍老矣風暖杏華天

寄無為居士

世俗事無盡養高心自閒蔬園通綠野林塢帶青山丹
竈慵添火雲庵懶著關別應修省術七十見朱顏

快亭

門徑杉松老悠悠日月閒法王真境界禪者舊家山祖
意傳來久人情妄自攀如何快我臆滿座水聲間

清涼軒

夏間避暑處軒戶對巖阿溪水漱無盡竹風來更多百
骸煩既謝諸祖意如何坐久聞魚戲時時動綠波

雙嶺清旦維那問訊

迥然生計別趣向少知音寂寞僧家事諠譁世俗心長
遭兒女累莫厭水雲深但樂西來意塵勞久自沈

送周道士

歸去靈溪觀匡廬碧嶂深澗松多偃蓋巖溜盡鳴琴不

死徒食藥長生可練心他年如有道飛錫一相尋

送張簽判遊開先

步入青松裏迢迢一徑通漸分華藏界深隱法王宮
道與神仙別人非世俗同欲知西祖意庭栢老春風

留題紹公寂照軒

幽軒名寂照四海坐中間景物有遷色主人無異顏
野泉澄檻外香藹起簷間涼夜誰相問寥寥月滿山

送人之南嶽

境幽南嶽寺路向碧巖分遠近松相接高低鐘共聞靈
禽時奏樂香石日籠雲想到經行處超然趣不羣

遊桃源贈劉君

宛若神仙府疑無世俗風人家山色裏門徑水聲中柳
線共垂綠桃葉相映紅烟光正和暖遊樂意何窮

題矮雞冠

潔白異衆卉堦前莎草齊曉來和露看只欠一聲啼

再遊永固院

悠悠塵世外居者少關心是事有遷謝斯門無古今乾坤同永久山水共幽深我愧重來此諸方懶去尋

寄蘇子由

徧因訪祖叅禪後拙直尋常見愛稀有道却從人事得無心應與世情違時光易變誰驚老真趣難窮自覺微尤荷多才深此意誼誼聲裏共忘機

送西安丐者

禪性天真蓮出水等慈及物別巖阿役供野老門門到

飯謁林僧寺寺過獨木溪橋人跡少孤村草店路頭多
風寒日晚獨歸處猶隔畚園五里坡

留題佚老庵

勞生唯有僧無事若悟真乘老便閒三徑園林禪況在
半庵風月道心還傍欄碧澗長來水隔岸青岑不買山
卻顧羣情塵土裏名牽利役自忘艱

送僧遊南嶽

住亦無求去亦閒颺然到處是家山偶棲龍嶠重巖寺

又憶融峰絕頂闕禪性誰同秋月皎吟情自得古風還
平生聚散三回首知向何時更會顏

和僊上人秋夜對月

香殘火冷漏將沈孤坐寥寥對碧岑萬井共當門有月
幾人同在道無心風傳喬木時時雨泉瀉幽巖夜夜琴
為報叅玄諸子道西來消息好追尋

題雲庵手帖三首

南禪師學魯公字最工當時歸南公者無不學之然無

出雲菴之右者昭默老人嘗與德洪共觀此書歎慕之
不已以謂不減楊少師一道人其珍之崇寧五年十月
十八日門人某題

雲菴和尚與檀越帖一紙伏讀如受訓詞叢林荒寒無
復平日此老知不復見況筆畫語言乎門人某流涕謹
書

跋山谷雲菴贊

雲菴住廬山時山谷過焉相與游鸞溪坐大石上擘窠

留題其法喜之游如槃裴公乃作此贊後二十餘年得
於衡陽毛氏之家持以還長沙開法長老覺慈實其的
孫時年二十三歲即以付之臨濟正脈使流通不斷乃
無所媿此贊其敬之哉宣和五年中秋前一日題

石倉歷代詩選卷二百二十八

欽定四庫全書

石倉歷代詩選卷二百二十九

明 曹學佺 編

宋詩一百六

契嵩

感遇

仙人白玉京去去何縹緲瓊樓十二層玲瓏汎雲表銀
潢月為波萬頃即池沼秋來宮殿光逗落人間曉空際

時澄明烟霞渺青鳥可望不可到所思空杳杳

二

蒼茫天地間流光一何遽嘗聞太古人未見曦輪駐才
沈崦嵒雲還上浮桑樹山色愁裏暝空形夢中曙安知
穆天子龍馬神為御萬里遞乘風騎向瑤臺去

三

空虛澄遠烟霽色含秋景思君每盤桓駐目千峰頂明
月初團圓下照美人影美人來不來雲霞渺林嶺

四

松栢地之靈草莽亦同茂願得區域中人心復純素蒼
梧會稽陰纍纍見陵墓六合無知音青山有歸路人生
惜朱顏賢哲長還顧昨夜露華臺誰不怨秋暮

懷越中兼示山陰諸明士

厭見人境喧清游憶靈越東南千萬山浮青滿寥泝從
來鑑中景形勝人間絕月湛換鵝溪雲起藏書穴客子
若飄蓬俄與故人別尺素未及通芳草已云歇所悲行

路難俯仰損名節鳴雁欲東飛寄語謝明月

早秋吟

山家昨夜房櫳冷梧桐一葉飄金井長天如水淨藏雲
明月含暉變秋景桂枝花折風飄飄誰在高樓吹玉簫
人間不見槎升漢天上將看鵲作橋年少征人在何處
白露霑衣未歸去海畔今無漂母家江南誰與王孫遇

浙江晚望

暮色看無際秋空水混天片帆飛鳥外新月落潮邊隔

越山形小吞吳地勢偏幾人來往老早晚渡頭船

題徑山寺

翠拔羣山外連天勢未休雲迷飛鳥道雨出濺龍湫僧
在深雲定香和杳靄浮人間遊不到臺殿自清秋

郎侍郎致仕

平時獨高謝道勝欲韜光白髮辭明主青山戀故鄉藥
畦容鶴到吟徑恐雲藏更愛禪林卧時來拂石牀

山中早梅

亭亭映晚景皎皎出林端
小園連雲淡孤芳冒雪寒
人間殊未見物外最先看
但欲方瓊玉寧將勝牡丹

汎若耶溪

越水乘春泛船窓掩又開
好山沿岸去驟雨落花來
岸影樵人渡歌聲浣女回
滄浪無限意日暮更悠哉

書毛有章園亭

愛此園林好重來花木滋
遊人醉不去幽鳥語無時
烟郭連芳草春湖泛綠池
松篁非俗韻遊子漫相期

山亭晚春

山庭晚來靜
林石自巉巖
犬去吠人語
花飛恣鳥銜
晴烟熏茂草
照日藹高杉
更喜團圓月
清光下碧巖

歲暮書懷

朔風適變寒
曉日將含煦
南國殊未還
東山歲云暮
浮生奄忽往
芳顏安得駐
寄謝人世間
紛華殊可悟

湖上晚歸

人間薄游罷
歸興尋舊隱
春岸行未窮
夕陽看欲盡
嵐

光山際淡天影水邊近自憐幽趣真清吟更長引

寄懷泐潭山月禪師

聞道安禪處松蘿杳隔溪清猿定中發幽鳥坐邊栖雲
影朝晡別山峰遠近齊不知誰問法雪夜立江西

送客還北闕道中作

北郭送之子日斜歸舊居路泥侵曉潤晦月逼春餘桑
柘雨中綠人烟闕外疎依然見風俗歸興混樵漁

送盧隱士歸廬山

世事如循環是非終莫盡羨爾歸深山任他譏小隱黃
鵠舉已高白雲去非近天籟歸寂寞何峰弄清軫

入石壁山

身似浮雲歲不留人間擾攘只宜休老來已習青蘿子
隱去應追白道猷直入亂山寧計路俄看落葉始知秋
他時谷口人相遇莫問裁詩謝五侯

著書罷思南還復會客自番禺來因賦此詩

平昔著書今粗畢南還終欲隱羅浮初春况遇故鄉子

終夜更誇滄海遊，但貴羊城風物好。
豈辭梅嶺路歧修，應須相與葛洪輩。
抗跡山林送白頭。

書南山六和寺

青蔥玉樹接溪岑，臺閣凌虛地布金。
行到白雲重疊處，水聲松韻淡人心。

寒食日雨中

漠漠行雲晴復陰，野花垂濕晚沈沈。
遊人莫怨天多雨，況在東皋春已深。

遊大慈山書畫上人壁

谷裏侵雲寺尋幽到深處
春過寒花開人來啼鳥去
豈期草菴客日暮此相遇

歲暮值雪山齋焚香獨坐
命童取雪烹茗因思
柳絮隨風起句遂取謝道
蘊傳讀之見其神
情散朗有林下風氣益發
幽興乃為詩兼簡

公濟上人冲晦

按冲晦即晤上人
公濟楊蟠也

簷外驚風幽鳥歸窓間獨坐
事還稀初看歷日新年近

喜見山林驟雪飛但憶故人能有詠寧懷久客此無衣
鮑昭湯老能乘興城郭何如在翠微

酬惟晤將欲見訪東山却寄

歲晚陰沈天宇昏宗雷訪我更攜君相期石屋宜投宿
獨憇山茨學卧雲雪映窓櫺人已靜風吟燈影夜初分
自憐惠水多閑散強接清言媿不文

酬楊公濟早過天竺呈明智及同遊二老

澗北夜依禪舍宿峰南今訪講師堂初行松路愛清曉

及過石橋聞異香
日色煖烘諸壑淨
晴嵐翠潑幾峰光
道標尚客何高趣
更飲吾曹栢葉湯

酬公濟遊天竺上寺呈東山仲靈冲晦

共訪迢遙深塢寺
仍隨野老賣樵還
鳥栖已定人方到
暮色雖濃戶未關
今宿巖房休問法
來朝臘屐重登山
平生勝友殊難會
莫厭相攜寂寞間

聞泉

歲晏林間宿
初聞况夜晴
漱寒醒客夢
飛響應山鳴
深

澗松風靜幽人石室清誰能以此意寫入冰桐聲

歲暮還西塢寄公濟無訾

乘興溪邊去仍來林下歸梅香帶春信日色暖人衣白
髮思還遠清流過更稀野禽寧會意相顧向柴扉

酬公濟見寄之作

脩然林下隱吾道異夫君習忍如幽草觀身類片雲人
情無意染鶴唳有時聞謝客詩懷寄憐君此興勤

新歲連雨不止因寄公濟兼簡賢令強公

寒郊纔喜歲葉新景物陰陰又一旬
雲帶天低垂壓野雨藏春晝暗迷
人寧愁燈火妨明月却嘆詩家惜
令辰
陶令而今卧江國倚樓吟望更誰親

附惟晤詩

將訪永安東山禪師先寄

庵在千株松桂下更無塵事到夫君
高蹤罕過呼猿澗靜思唯看抱石
雲日暮燈龕禽影集雪晴崖罅路
形分揚
雄約我須投宿月裏禪餘怯論文

奉和楊公濟宿永安方丈呈東山禪師

道安獨繼襄陽踵詩好慵窺雪晝評竹屋數間經幾載
草衣三事傲平生縱陪林下收孤迹難學人間走大名
燈火已殘談未倦曉風斜雨打窓聲

酬東山禪師喜公濟冲晦過訪

白雲蒼海一重重傍舍遙聞隔塢鐘月上更無人語響
雪深空認虎行踪詩書共喜燈前論茗菓翻疑夢裡逢
脫塵高談無限樂煨爐寒擁日高春

酬公濟早過天竺呈明智及同遊二老

曉過翻經臺下寺與君同謁祖師堂
庭前紫桂葉頻脫石上紅梅花正香
出洞陰雲開遠影挂松寒日漏清光
謝公勸飯須無讓不許非時薦茗湯

酬東山禪師南澗傍遊戲呈公濟冲晦

撥雲過得南隴去流水激澣一澗長
磐石誰堆補缺岸老松自倒成危梁
沙禽呼雌頻叫噪山藥吐色常芬芳
臘去春歸山愈好喜君共無塵事忙

酬東山禪師同公濟冲晦遊天竺兼呈伯周禪

老

平昔詩禪友契深更來人外事幽尋雨餘澗壑流寒響
歲晏檉杉老翠陰袒跣不妨陶令醉風流多傲洛生吟
山翁解榻延清賞未放前賢勝竹林

和公濟宿天竺再贈東山禪師與冲晦作

燈火青熒雲塢寺清猿叫斷有餘音檻梅雪白春風近
山雨盆傾澗水深背世迹憐高鳥迹結交心契老松心

酬君秀句無新語徒攪詩腸徹曙吟

聞泉

澗泉吾所好山舍寂無喧
春脈生雲底夜聲來枕前
風休不動竹月上未啼猿
石上鳴逾急冷然清夢魂

和仲靈送公濟冲晦出山兼簡駐泊李思文

招攜綠野村邊去累日青山曠
世機惜向永安蘭若別
還經靈隱渡頭歸雲峰積雪迷樵徑
石罅新泉濺客衣
詩會却扳簪紱貴心隨雲鳥入城飛

酬公濟遊山歸遇雨呈仲靈冲晦

興高殊肯輟清詩
捨轎重扶櫺栗枝
松栢青肥春雨洗
烟雲輕健潤風吹
樵歸後塢連聲唱
鹿過前溪失隊悲
莫道還家甘寂默
陶潛自有五男兒

酬仲靈見寄之作

今日追懷昨日遊
二君乘興似奔流
遠尋幽壑行拖屐
累到深雲卧枕丘
巖竹蕭疎晴影亂
塢梅零落晚香收
會須重訪藤州老
更約高才沈隱侯

附楊蟠詩

約冲晦宿東山禪寺精舍先寄

上人合動林間興
吾恨衰遲學謝安
納屐操節那有限
吹雲落雨漫無端
先憑寄語春枝破
預想分題雪屋寒
林下不諳人世苦
笑將雙鬢與君看

宿永安方丈呈東山禪師

千年道在高僧傳
末論詩人更有評
曾著文章原大道
還推性命濟羣生
白雲已鎖山間寺
流水空傳世上名

林遠不聞鐘磬作五更幽鳥轉春聲

酬東山禪師喜公濟冲晦過訪作

數百招提隱亂峰蒼茫那辨講堂鐘
春酣賴得黃鸝報路轉唯尋白鹿蹤
庵在月邊長不鎖興來天外忽相逢
山人莫笑衣冠客亦有梁鴻待賃春

遊靈隱遇雨呈普慈及二詩翁

山老未容山客去故將雲陣鎖山門
雨催晚色凝諸嶺雷送鐘聲落後村
今夜青林妨月上故人華髮把詩論

來朝山水終瀰汎策杖相隨討澗源

早過天竺呈明智及同遊二老

雨夜靈峰卧竹床平明屐齒到雲堂
門前雨過新溪滿石上風回舊草香
山抱鐘聲圓不散雲鋪瓦面冷無光
理公莫怪詩相惱今日偕行總姓湯

和東山禪師南澗傍遊戲呈公濟冲晦

澗南一嘯清風發林下重來白日長
雲遠石深連鷺嶺水寒沙淺似魚梁
漫因野老詢前事閒伴幽人擷衆芳

更欲窮源情未已知君嗔我索歸忙

遊天竺上寺呈東山仲靈冲晦

入林已忻猿鳥樂共傲浮天勝大還身外是非雲不繫
社中留戀雨相關籃輿寂寞媿彭澤拄杖風流肖德山
寄語葛洪巖下水莫流清夢到人間

酬仲靈同遊天竺兼呈伯周禪老

不問猿崖鳥道深攜筇著屐伴君尋山中桂子驚寒夜
雪後梅花逼歲陰欲住更逢青眼顧相看須盡白頭吟

他年倘續高僧傳未放湯休與道林

酬仲靈送公濟冲晦出山蕪簡駐泊李思文之

作

臘後東風掃翠微同看楊柳問禪機
三宵聽水都無夢
幾日登山未肯歸
野老止憑雲送客
家人應笑雨沾衣
君詩蕪簡佳公子只恐囊傾一夜飛

酬仲靈見寄之作

猿聲未落鳥聲愁
筍發花開澗水流
還對春風驚節物

漫思野老傍林丘古人得道多深隱賢守知名貴早收
林下頻過君莫訝誰看骨相具封侯

寄東山禪師

高卧西林月孤閒獨見君杖藜循澗水欹枕看山雲鹿
過何人見猿啼只自聞篇章知不少寄我莫辭勤

石倉歷代詩選卷二百二十九

欽定四庫全書

石倉歷代詩選卷二百三十

明 曹學佺 編

宋詩一百七

僧保暹

秋暹

杉竹清陰合閒行意有憑涼生初過雨靜極忽歸蟲
跡穿幽穴苔痕接斷稜翻思深隱處峰頂下層層

僧古懷

原上秋草

秋來深徑裏老病眼慵開戶外行人絕林間朔吹回亂
蛩鳴古塹殘日照荒臺惟有他山約相親入望來

僧秘寅

山中

結茅臨水石淡寂益閒吟久雨寒蟬少空山落葉深危
樓乘月上遠寺聽鐘尋昨得江山信期來此息心

僧宇昭

曉發山居

蓐食小人家寒燈碎落花雞鳴窗半曉路暗月西斜世
故欺懷抱風霜近歲華劇憐詩思苦悽惻向長沙

僧惠洪

早行

失枕驚先起人家半夢中聞雞憑早晏看斗辯西東轡
濕知行露衣單怯曉風秋陽弄光影忽吐半林紅

僧宇昭

夕陽

向夕江天迥微微接水平帶帆歸極浦隨客上荒城雲
外僧看落山西鳥過明何人對幽怨冉冉敗莎并

贈魏野

別業惟栽竹多閒亦好奇試泉尋寺遠買鶴到家遲藥
就全離母詩高祇教兒未能終住此共有海山期

塞上贈三太尉

飛將是嫖姚行營已近遼河水堅度馬塞雪密藏鵬敗
卒殘旗在全軍列帳遙傳呼更號令今夜取天驕

塞上贈王太尉

嫖姚立大勲萬里絕塵氛馬放降來地鵬閑戰後雲月
侵孤壘沒燒徹遠無分不慣為邊客宵笳懶欲聞

寄題武當郡守吏隱亭

郡亭傳吏隱閒自使君心卷幕知來客懸燈見宿禽茶
煙逢石斷棋響入花深會逐南帆便乘秋寄此吟

留題承旨宋侍郎林亭

翰苑營嘉致到來山意深會茶多野客啼竹半沙禽雪
溜懸危石棋燈射遠林言詩素非苦虛答侍臣心

僧修睦

宿岳陽開元寺

竟日凭虛欄何當興歎頻往來人自老今古月長新風
逆沈魚唱松疎露鶴身無眠鐘又動幾客在迷津

僧景雲

老僧

日照西山雪老僧門始開凍瓶黏柱礎宿火陷爐灰
童子病歸去鹿麋寒入來齋鐘知漸近枝鳥下生臺

僧子蘭

華嚴寺望樊川

萬木葉初紅人家樹色中疎鐘搖雨脚積水浸雲容
雪磧迴寒雁村燈促夜春舊山歸未得生計欲何從

尚顏

夷陵即事

不難饒白髮相續是灘波避世嫌身晚思家乞夢多暑
衣經雪著凍研向陽呵豈能臨歧路還聞聖主過

僧虛中

贈栖禪上人

巖房高且靜住此幾寒暄鹿嗅安禪石猿啼乞食村朝
陽生樹罅古路透雲根獨步閒相覓淒涼碧洞門

僧清尚

贈樊川長老

瘦顏諸骨現滿面雪毫垂坐石鳥疑死出門人謂癡照
身潭入楚浸影檜生隋太白曾經夏清風涼四肢

希晝

書惠崇師房

詩名在四方獨此寄閒房故域寒濤濶春城夜夢長禽
聲沈遠木花影動回廊幾為分題客殷勤掃石牀

寄懷古

見說鵬陰僻人煙半雜羌秋深邊日短風動曉笳長樹
勢分孤壘河流出遠荒遙知林下客冷苦夜禪忘

送嗣端東歸

遠念生泉石人中事欲銷卷衣城木落尋寺海山遙帆
影迷寒雁經聲隱暮潮後期俱未定況我鬢先凋

送可倫赴廣南轉運凌使君見招

別語畏殘漏心懸瘴海邊回期無定日去路極遙天苦
霧沈山郭寒沙漲隰田幾宵尋使府清話廢閒眠

早春闕下寄觀公

客心長念隱早晚得書招看月前期阻論山靜會遙微
陽生遠道殘雪下中宵坐見青門柳依依又結條

僧保暹

宿宇昭師房

與我難忘舊多期宿此房卧雲歸未得靜夜話空長草
際沈螢影杉西露月光天明共無寐南去水茫茫

送簡長上人之洛陽

閒身無所滯獨去背春城望越鄉心斷迎嵩隱思生野
禪依樹遠中飯傍泉清相府如投刺分題有竺卿

早秋閒寄宇昭

窗虛枕簟明微覺早涼生深院無人語長松滴雨聲詩
來禪外得愁入靜中平遠念西林下相思合慰情

僧文兆

宿西山精舍

西山乘興宿靜稱寂寥心一徑杉松老三更雨雪深草

堂僧語息雲閣磬聲沈未遂長棲此雙峯待曉尋

送簡長師之洛

動靜非常態超然西去心水期經洛聽雲約到嵩吟齋
訪煙村遠禪依竹寺深祇應風雅道相府是知音

僧行肇

郊居吟

靜室簾孤捲幽光墜露多徑寒杉影轉窗晚雪聲過茗
味沙泉合鑪香竹靄和遙懷起深夕舊寺隔滄波

酬贈夢真上人

禪舍因吟往晴來坐徹宵春通三徑晚家別九江遙巢
重禽初宿窗明葉旋飄住期應未定謝守有詩招

送文光上人西遊

高木墜殘霖關河入遠心嵩遊忘楚夢華近識秦音塔
古懸圖認碑荒背燒尋幾思興替事獨上灞陵吟

僧簡長

送僧南歸

漸老念鄉國先歸獨羨君吳山全接漢江樹半藏雲振
錫林煙斷添餅澗月分重樓上方定孤狖雪中聞

送行禪師

南國山重疊歸心向石門寄禪依鳥道絕食過漁村楚
雲黏餅凍江沙濺衲昏白雲深隱處枕上海濤翻

僧惟鳳

與行肇師宿廬山棲賢寺

冰瀑寒侵室圍爐靜話長詩心全大雅祖意會諸方磬

斷危杉月燈殘古塔霜無眠向遙夕又約去衡陽

寄希畫

間中吟髯改多事與心違客路逢人少家書入闕稀秋
聲落晚木夜魄透寒衣幾想林間社他年許共歸

弔長禪師

霜鐘侵漏急相弔晚悲濃海客傳遺偈林僧寫病容漱
泉流落葉定石集鳴蛩回首雲門望殘陽下遠峯

僧惠崇

訪楊雲卿淮上別墅

池近得頻到相携向野亭
河分岡勢斷春入燒痕青
望久人收釣吟餘鶴振翎
不愁歸路晚明月上前汀

贈文兆

偶依京寺住誰復得相尋
獨鶴窺朝講隣僧聽夜琴
注餅沙井遠鳴磬雪房深
久與松蘿別空懸王屋心

僧宇昭

寄保暹師

金匱要略卷之二十一
卷二百三十一
吟會失秋期荒山寄病時客髭生白早叢木落青遲渴
猊窺莎井陰蟲占菊籬歸心何以見霜月下天涯

幽居即事

掃苔人迹外漸老喜深藏路僻間行遠春晴晝睡長餘
花畱暮蝶幽草戀殘陽盡日空山下孤禪念石霜

僧懷古

寺居寄簡長

雪苑東山寺山深少往還紅塵無夢想白日自安閒杖

履苔痕上香燈樹影間何須更飛錫歸隱沃洲山

居天柱山

四野豁家庭柴門夜不扃水邊成半偈月下了殘經雖
逐諸塵轉終當一念醒未知斯旨者萬役盡勞形

僧智圓

贈聞聰師

澹然塵慮絕禪外苦風騷性覺眠雲僻名因背俗高水
煙蒸紙帳寒髮澀銅刀幾宿秋江寺間吟聽夜濤

僧遵式

酬伉上人

鳥卧清間極誰能更似君山光晴後見瀑響夜深聞拾
句書幽石收茶踏亂雲江頭待無事終學弃人羣

贈智倫弟

溪竹擁疎簾溪雲冷不厭千巖惟虎伴一講許詩兼煮
茗歆氷柱看經就雪簷有時開靜戶寒日下峯尖

僧道潛

再遊鶴林寺

招隱山南寺重來歲已寒
風林驚墜雪雨澗咽飛湍
壁暗詩千首霜清竹萬竿
東軒謫仙句洗眼共君看

僧清順

書景舒庵壁

大布君能衣始知蠶口非
冢間容一榻身外只三衣
護戒避生草淨心觀落暉
寂寥能自守今世固應稀

僧惠洪

贈尼昧上人

不著包頭絹能披壞衲衣愧無灌溪辯敢對末山機未
肯題紅葉終期老翠微余今倦行役投杖夢煙霏

僧善權

寄致虛兄

避寇經重險懷君屢陟岡空餘接浙飯無復宿春糧衣
袂饒霜露柴荆足虎狼春來何所恨棣萼政含芳

僧元肇

虎丘

滄海何年湧泰傳虎踞丘池空劒光冷墳闕鬼吟愁石
磴樓臺側煙深草木浮吳人貪勝槩春盡亦來遊

徑山

東西兩徑幽歲晚得同遊壑霽陰猶在溪雲凍不浮鳥
驚樵斧重猿掛樹枝柔怕有梅花發因行到水頭

僧善珍

山行晚歸

藥徑入雲林晚晴扶杖吟照泥星復雨經朔月猶陰樹
折憐巢覆泉清見葉沈愛閒自如此不是學灰心

春寒

松間燈夕過顧影在天涯雪暝迷歸鶴春寒誤早花艱
難知世味貧病厭年華故國風塵外無人可問家

僧自南

廣潤寺新寮

客不赴齋招冥心坐寂寥青山若厭看白日也難消鷺

起衝荷葉蟲行蝕菊苗何年稱老宿來住此間寮

僧簡長

贈浩律師

浩也毘尼學精於玉帳嚴蟻酣停掃砌燕乳記鈎簾茶
鼎敲冰煮花壺漉水添夢回池草綠忍踐綠纖纖

僧道潛

夏日龍井書事四首

翠樹高蘿結書陰驕陽無地迫吾身石崖細聽紅泉落

林果初嘗碧奈新揮麈已欣從惠遠談經終恨少遺民
何時暫着登山屐來岼烏紗漉酒巾

雨氣千巖爽氣新孤懷入夜與誰隣風蟬故故頻移樹
山月時時自近人禮樂汝其攻我短形骸吾已付天真
露華漸冷飛蚊息窗裏吟燈亦可親

自憐多病畏炎曦長夏投蹤此最宜青石白沙含淺瀨
碧梧蒼竹聒涼颼雲中雞犬聽難辨谷口漁樵問不知
斑杖芒鞋隨步遠歸來煙火認茅茨

却來人外慰棲遲
谷遠山長萬事遺
好鳥未嘗吟俗韻
白雲還解弄奇姿
藤花冉冉青當戶
竹色娟娟碧過籬
不羨故人探禹穴
短橈孤榜逐漣漪

僧如璧

次韻答呂居仁

向來相許濟時功
大似頻伽響遠空
我已定交木上座
君猶求舊管城公
文章不療百年老
世事能排雙頰紅
好貨夜窗三十刻
胡牀趺坐究幡風

再次前韻


曾將千古較窮通
芥孔能容幾許空
借問折腰辭五斗
何如攘臂取三公
四時但覺風雨過
一飯何須刀几紅
要識壞魔三昧力
更培根撥待春風

僧顯萬

送炭與湘山西堂惠然師

紛紛向火乞兒多
獨有君如擇乳鷺
萬鍛爐中尋藥可
一堆灰裏撥陰何
雪歌敗屋閑犀柄
草卧空庭任雀羅

亟送烏薪相煖熱恐隨春夢入南柯



石倉歷代詩選卷二百三十